

VENDIM

Nr.1065, datë 29.12.2010

PËR KRITERET DHE PROCEDURAT E KRYERJES SË RIMBURSIMIT NGA TAKSA E BIZNESIT TË VOGËL TË PAGESËS PËR PAJISJET FISKALE DHE TAKSIMETRAT

Në mbështetje të nenit 100 të Kushtetutës dhe të nenit 11 të ligjit nr.9632, datë 30.10.2006 “Për sistemin e taksave vendore”, të ndryshuar, me propozimin e Ministrit të Financave, Këshilli i Ministrave

VENDOSI:

1. Bizneseve, objekt i ligjit nr.9632, datë 30.10.2006 “Për sistemin e taksave vendore”, të ndryshuar, që kanë bërë pagesën e blerjes së pajisjes së parë fiskale deri në datën 28.2.2011, nga “Shoqëritë e autorizuar”, sipas kontratës përkatëse, u rimbursohet kjo pagesë deri në shumën 44 000 (dyzet e katër mijë) lekë, pa TVSH.

2. Tatimpaguesi duhet të dorëzojë pranë zyrës së taksave të bashkisë apo të komunës, ku është i regjistruar, brenda datës 31 mars 2011, formularin e rimbursimit të pagesës për pajisjen fiskale sipas formatit bashkëlidhur këtij vendimi, së bashku me dokumentacionin, si më poshtë vijon:

a) Kopjen e mandatpagesës së bërë për blerjen e pajisjes së parë fiskale ose kuponin tatimor, të shoqëruara me kopjen e faturës së blerjes;

b) Kopjen e kontratës me një nga “Shoqëritë e autorizuar” nga Ministri i Financave, për ofrimin dhe mirëmbajtjen e pajisjeve fiskale në rastin e pajisjeve fiskale.

2.1. Në rastet kur tatimpaguesi ka blerë pajisjen fiskale nga “Shoqëria e autorizuar”, Bashkimi i Operatorëve PKP & Rilindja, sh.p.k., për blerjet deri në datën 26.7.2010, datë në të cilën kësaj kompanie i është hequr autorizimi nga Ministria e Financave, tatimpaguesi duhet të dorëzojë pranë zyrës së taksave të bashkisë apo të komunës, ku është i regjistruar, dokumentacionin e paraqitur në shkronjat “a”, “b” dhe “c”, të pikës 2, përmendur më lart, të këtij vendimi.

2.2. Tatimpaguesi, që ushtron veprimtari në ofrimin e shërbimit të taksisë, duhet të dorëzojë pranë zyrës së taksave të bashkisë apo të komunës, ku është i regjistruar, brenda datës 31 mars 2011, formularin e rimbursimit të pagesës për taksimetrit, sipas formatit bashkëlidhur këtij vendimi, së bashku me dokumentacionin e mëposhtëm:

a) Kopjen e faturës së blerjes së taksimetrit.

b) Kopjen e kontratës me shoqërinë shitëse të taksimetrave (nëse disponohet).

c) Kopjen e njoftim - vlerësimit tatimor për vitin ushtrimor, të lëshuar nga zyra e taksave të bashkisë ose të komunës.

ç) Faturën e plumblosjes që vendoset nga Drejtoria e Përgjithshme e Metrologjisë.
(Ndryshuar me VKM nr. 190, dt. 9.3.2011.FI.Z. Nr. 24 dt. 23.3.2011.).

3. Zyrat e taksave të bashkive ose të komunës, ku është i regjistruar tatimpaguesi, bëjnë përlogaritjen e detyrimit të kësteve të taksës së biznesit të vogël, sipas nenit 11 të ligjit nr.9632, date 30.10.2006. Në rast se plotësohen kushtet e përcaktuara në pikën 2 të këtij vendimi, rimbursimi fillon me këstin e tremujorit të katërt të vitit 2010, i cili paguhet deri në datën 20 janar 2011, dhe në rast se:

a) diferenca ndërmjet këstit për t’u paguar dhe shumës së rimbursueshme është pozitive,

tatimpaguesi paguan këtë diferencë;

b) diferenca ndërmjet kështit për t'u paguar dhe shumës së rimbursueshme është negative, mbartet për t'u rimbursuar nga kështet pasardhëse.

4. Brenda 30 (tridhjetë) ditëve nga afati i pagesës së kështit pasardhës të taksës së biznesit të vogël, drejtoritë rajonale të taksave, në varësi të Drejtorisë së Përgjithshme të Tatimeve, rakordojnë me zyrat e taksave të bashkive dhe të komunave për shumat e pagesave të pajisjeve fiskale të biznesit të vogël për t'u rimbursuar nëpërmjet taksës së biznesit të vogël.

5. Bizneseve, subjekt i biznesit të vogël, që janë të përfshira në skemën e TVSH-së apo që do të përfshihen në skemën e TVSH-së brenda 6 (gjashtë) muajve nga hyrja në fuqi e ligjit nr.10 354, date 18.11.2010 "Për disa shtesa e ndryshime në ligjin nr.9632, datë 30.10.2006 "Për sistemin e taksave vendore", të ndryshuar, TVSH-ja e paguar për blerjen e pajisjes fiskale u kreditohet sipas procedurave të përcaktuara në ligjin për TVSH-në.

Bizneseve të tjera, që nuk janë të përfshira në skemën e TVSH-së dhe që nuk regjistrohen në skemën e TVSH-së brenda 6 (gjashtë) muajve, TVSH-ja e paguar për blerjen e pajisjes fiskale do t'u rimbursohet nëpërmjet reduktimit të kështeve të taksës së biznesit të vogël.

6. Bizneseve, subjekt i biznesit të vogël, që operojnë në fushën e transportit sipas përcaktimeve të bëra në aneksin 5 të ligjit për taksat vendore dhe që kanë detyrimin për t'u pajisur me taksimetër, u rimbursohet pagesa e bërë për blerjen e taksimetrit, sipas faturës përkatëse, deri në shumën 30 000 (tridhjetë mijë) lekë, pa TVSH.

Procedura e këtij rimbursimi është e njëjtë, si në rastin e rimbursimit për pajisjet fiskale, të përcaktuar në këtë vendim.

(Ndryshuar me VKM nr. 190, dt. 9.3.2011.FI.Z. Nr. 24 dt. 23.3.2011.).

7. Ngarkohen Ministria e Financave, Drejtoria e Përgjithshme e Tatimeve, Ministria e Brendshme dhe njësitë e qeverisjes vendore për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Sali Berisha

Botuar ne Fletoren Zyrtare Nr. 185, dhjetor 2010.

Ndryshuar me VKM nr. 190, dt. 9.3.2011. Botuar ne Fletoren Zyrtare Nr. 24 date 23.3.2011.